
“Бағдод фидер” мукаммал таъмирланмоқда

Куз-қиш мавсумига тайёргарлик кўриш, узатмаларда юзага келиши мумкин бўлган носозликларнинг олдини олиш мақсадида жойларда мукаммал ва жорий таъмирлаш ишлари олиб борилмоқда.

Жумладан, Бағдод туманининг “Саидобод”, “Самарқанд” (бир қисми), “Меҳнатобод” маҳалла фуқаролар йиғинлари ҳамда Навбахор қишлоғи ҳудудларини электр энергияси билан таъминловчи 10 кВли “Бағдод” электр узатиш тармоғи туман электр таъминоти корхонаси ходимлари томонидан мукаммал таъмирланмоқда.

Таъмирлаш жараёнида носоз изоляторлар ва яроқсиз симларни янгисига алмаштириш, салқи симларни тортиш ҳамда тармоқни дарахт шохларидан тозалаш ишларини бажариш кўзда тутилган.

Туман электр таъминоти корхонаси ишлаб чиқариш бўлими муҳандиси Муроджон Жамоловнинг маълум қилишича, “Бағдод” электр узатиш тармоғи орқали 1 минг 783 та аҳоли хонадонлари, 60 дан зиёд яқин тадбиркорлик субъекти ва 10 га яқин ижтимоий соҳа объектларига электр энергияси етказиб берилади. Демакки, тармоқда мукаммал таъмирлаш ишларининг сифатли бажарилиши келгусида ушбу манзилларда таъминотнинг яхшиланиши ҳамда мавжуд муаммоларнинг ижобий ҳал этилишига сабаб бўлади.

Бағдод тумани ҳокимлиги Ахборот хизмати.

2023-09-07 17:27:08